

VENERABILI FRATRI

JOANNI EPISCOPO STI GERMANI DE RIMOUSKI.

CANADA.

LEO P. P. XIII.

Vener, Frater, Salutem et Apostolicam Benedictionem.

Merito, Venerabilis Frater, das gloriam Deo debitasque illi gratias persolvis quod non siverit, Ecclesiam diu suam lugere viduitatem. Equidem imparem prorsus in Nobis ejus necessitati Rectorem illi præfecit; at qui adolescentulum elegit ad populum suum a Philisthæo liberandum, potest utique et infirmitate Nostra uti ad dissipandas hostium suorum machinationes viresque frangendas: manus enim ejus non est abbreviata. Ipsi itaque soli fidentes omina tua, quibus suffragatur infallibilis Christi promissio, libenter excipimus; et grati officiis tuis, ominamur, ut quam de malo victoriam à bono referri desideras, eam non solum adductam videre valeas, sed amplioribus etiam in dies auctam incrementis prosperitatis Ecclesiæ et populorum. Deus tibi constantiam et auxilia sufficiat ad illam pro viribus parandam ac maturandam; et auspex interim superni favoris tibi sit Apostolica Benedictio, quam præcipuè Nostræ benevolentiæ testem tibi, Venerabilis Frater, Cleroque et populo tuo toti peramanter impertimus.

Datum Romæ apud S. Petrum 27 Junii 1878.

Pontificatus Nostri anno Primo.

[Sign.]

LEO P. P. XIII.